

दिनांक 09.10.2024

समय: 18.45 बजे

खास समाचार

- केन्द्र सरकार ने राजस्थान अर पंजाब रा सरहदी हलकां मांय दो हजार दो सौ अस्सी किलोमीटर लम्बी सड़कां बणावण री मंजूरी दीनी।
- राष्ट्रपति द्रौपदी मुर्मू परम्परागत दवाइयां री उपलब्धता बधावण सारु नौजवानां कानी ऊं आयुर्वेद रा हलका मांय उद्यम लगावण माथे जोर दीनो।
- पशुपालन मंत्री जोराराम कुमावत मोबाइल वेटरनरी यूनिट कॉल सेंटर जनता ने सूंप्यो।
- जयपुर रा सवाईमानसिंह मेडिकल कॉलेज मांय रेजिडेंट डॉक्टर आज दूजा दिन ई हड़ताल कीनी।

000

केन्द्र सरकार देश रा सरहदी हलकां मांय ढांचागत विकास माथे खास ध्यान देता थकां राजस्थान अर पंजाब रा सरहदी हलकां मांय दो हजार दो सौ 80 किलोमीटर लम्बी सड़कां बणावण री मंजूरी दीनी है। प्रधानमंत्री नरेन्द्र मोदी री सदारत मांय आज व्ही मंत्रिमंडल री मीटिंग मांय ओ फैसलो करी ज्यो। सूचना अर प्रसारण मंत्री अश्विनी वैष्णव नई दिल्ली मांय खबरनवीसां ने आ जाणकारी दीनी। वे बतायो के ई काम माथे 4 सौ करोड रुपया ऊं री बत्ती रकम खर्च व्हेला। मंत्री कह्यो की इण ऊं सरहदी हलकां बीच संपर्क अर पहुंच आसान बण जावेला अर गांवाई हलकां मांय नौकरी धंधा रा मौका बधेला। वे बतायो के जनता मांय खून अर पोषक तत्वां री कमी आगी करण सारु सूक्ष्मग पोषक तत्वां वाळा चावल री पूर्ति री मंजूरी ई दे दीनी है। मंत्री वैष्णव बतायो के इण ऊं लोगां ने बेहतर पोषण मिलेला।

000

मंत्री वैष्णव बतायो के समावेशी विकास अर पोषण सुरक्षा रा मकसद ऊं ई योजना माथे 17 हजार करोड रुपया ऊं बत्तो खर्च आवेला। सूचना अर प्रसारण मंत्री कह्यो के विकास भी विरासत भी पहल रो जिक करता थकां वैष्णव कह्यो के सरकार गुजरात रा लोथल मांय राष्ट्रीय समुद्री विरासत परिसर बणावण री मंजूरी दे दीनी है। वे कह्यो के ई रे जरिये देश री समृद्ध समुद्री विरासत रो दरसाव कर्यो जावेला।

000

राष्ट्रपति द्रौपदी मुर्मू देश मांय पारंपरिक दवाइयां री उपलब्धता बधावण सारु आयुर्वेद हलका मांय उद्यम लगावण सारु नौजवानां ने बधावो देवण री जरूरत माथे जोर दीनो है। वे आज नई दिल्ली मांय अखिल भारतीय आयुर्वेद संस्थान रा आठवां स्थापना दिवस जळसा रा उद्घाटन रे मौके बोल रही ही। राष्ट्रपति कह्यो के आयुर्वेद हमेशा ऊं लोगां री जिन्दगी रो अटूट हिस्सो रह्यो है। वे भरमावण वाळा विज्ञापन अर नकली दवाइया ने बधावो दे र जनता सागे दगाबाजी करण वाळा रे खिलाफ करड़ी कार्यवाही री जरूरत बताता थकां कह्यो के देश मांय आयुर्वेद रा काबिल डॉक्टरां री जरूरत है ताकि लोगां नें नाकाबिल डॉक्टरां ऊं राय नी लेवणी पड़े।

000

राष्ट्रपति भरोसो जतायो के आवता दिना मांय आयुर्वेदिक डॉक्टरां री तादाद और बधेला। राष्ट्रपति अनुसंधान अर विकास सारू बुनियादी ढांचा मांय सुधार री जरूरत माथे जोर देता थकां कह्यो के किण ई संगठन री लगातार बरकत सारू अनुसंधान अर विकास जरूरी है। ई मौके स्वास्थ्य आयुष प्रदर्शनी अर आयुष औषधि केन्द्र री सरूआत करी ज्यी। जळसा मांय आयुष मंत्री प्रतापराव जाधव ई मौजूद हा।

000

प्रधानमंत्री नरेन्द्र मोदी री अगुवाई वाळी केन्द्र सरकार रा तीजा कार्यकाल रा पहला एक सौ दिन मांय करी ज्या खास कामां री जाणकारी देवण सारू आकाशवाणी जयपुर रा प्रादेशिक समाचार बुलेटिनां मांय खास श्रृंखला चलायी जा रही है। इण मांय आज पेश है रक्षा हलका मांय खुद रे पाण ऊबा व्हेवण सारू रक्षा मंत्रालय री एक मोटी पहल री जाणकारी —

रक्षा मंत्रालय 26 हजार करोड़ रुपया ऊं बत्ता खर्च वाळा सुखोई-30 एमकेआई जंगी जहाज़ सारू 240 ए.एल.-31 एफ.पी. एयरो इंजन री खरीदी बाबत हिंदुस्तान एयरोनॉटिक्स लिमिटेड-एच. ए.एल. सागे करार कीनो है। अ इंजिन एच.ए.एल. रा कोरापुट डिवीजन मांय बणाया जावेला। वायु सेना ने हर साल ऐड़ा 30 इंजिन दिया जावेला। ई भांत सगळा 240 इंजन आवता आठ साल मांय मुहैया करा दिया जावेला। इंजिन देवण रा कार्यक्रम रा आखिर ताई एच.ए.एल. देशी सामान 63 फीसदी ताई बधा देवेला, जिण ऊं आं इंजन री मरम्मत रा काम मांय देशी सामग्री ने बधावण मांय मदद मिलेला।

000

पशुपालन मंत्री जोराराम कुमावत आज जयपुर मांय मोबाइल वेटेनरी यूनिट रो कॉल सेंटर जनता ने सूंप्यो। ई मौके वे कह्यो के मोबाइल वेटेनरी यूनिट घर-घर जा र मांदा ढांडा रो ईलाज करेला। हर मोबाइल वेटेनरी यूनिट मांय एक डॉक्टर, एक पशुधन सहायक अर एक ड्राइवर व्हेला। कार्यक्रम मांय पशुपालन राज्य मंत्री जवाहर सिंह बेदम ई मौजूद रह्या। पशुपालन विभाग ऊं मिली जाणकारी रे मुजब हर 1 लाख ढांडा परां एक मोबाइल वेटेनरी यूनिट काम करेला। प्रदेश मांय 536 मोबाइल वेटेनरी यूनिट रे मार्फत ढांडा अर ईलाज री व्यवस्था करी ज्यी है। कॉल सेंटर माथे ढांडा रा 10 डॉक्टर अर तकनीकी चिकित्सा कर्मचारी मौजूद रेहवेला। ढांडा मांय सामान्य बीमारियां रा ईलाज सारू टेली मेडिसिन री व्यवस्था करी जावेला। ई रे अलावा पशु प्रबंधन अर पोषण रा बारा मांय ई राय दी जावेला। कॉल सेंटर रा हेल्प लाईन नंबर 1962 माथे फोन कर र पशुपालक आं सेवावां रो फायदो ले सके है। सवाईमाधोपुर जिला मांय ई योजना रा तैत पशुपालन विभाग रा संयुक्त निदेशक डॉ. राजीव गर्ग ढांडां रा अस्पताल ऊं सात वेटेनरी मोबाइल यूनिट ने रवाना कीनी। बांसवाड़ा रा जिला कलेक्ट्री परिसर मांय राखी ज्या कार्यक्रम मांय जिला कलेक्टर ऑनलाइन 1962 मोबाइल वेटेनरी सेवा जनता ने सूंपी।

000

जोधपुर मांय कोंगो बुखार ऊं एक महिला री मौत पाछे चिकित्सा प्रशासन अलर्ट जारी कीनो है। ई महिला री काल अहमदाबाद मांय मौत व्हे ग्यी ही। आ महिला जोधपुर कने नांदडाकलां गांव री रेहवासी ही। ई महिला ने 30 सितंबर ने एक गैर सरकारी अस्पताल मांय भर्ती करी ज्यी। अहमदाबाद ऊं ई महीना रा नमूना पुणे री प्रयोगशाला मांय भेजी ज्या, जठे कोंगो बुखार री ठा पड़ी। जनस्वास्थ्य निदेशक डॉ. रवि प्रकाश माथुर आकाशवाणी ने बतायो के इण रा असर वाळां हलका मांय रेपिड रेस्पॉन्स टीम भेजण रा हुकम दिया ज्या है। कोंगो बुखार री बीमारी माथे काबू करण सारू ई रा लक्षण वाळा मरीजां रा नमूना ले र तुरत जांच करावण री राय दीरीजी है। डॉ. माथुर बतायो के जोधपुर मांय साल 2015 अर 2019 मांय ई कोंगो बुखार ऊं कुछ मरीजां री मौत व्हे ग्यी ही। कोंगो बुखार हिमोरल नाम रा परजीवी विषाणु रे कारण व्हे है जो घर मांय पाळी ज्या जिनावरां री चमड़ी माथे मिले है। इण री फेंट मांय आवण परां तेज ऊन आवे है, आंख्या बळे है, रोशनी ऊं डर लागे है, चक्कर आवे है अर मांशपेशियां मांय घणो दुखे है। ई रे

अलावा मरीज री पीठ मांय दर्द व्हेवण, उल्टी आवण अर गळो बैठ जावण सरीखी परेशानियां ई ने आवे है।

000

जयपुर रा सवाईमानसिंह मेडिकल कॉलेज मांय रेजिडेंट डॉक्टर आज दूजा दिन ई हड़ताल माथे रह्या, हालांकि आपातकालीन सेवा चालू है। हड़ताल रे कारण अस्पताल मांय मरीजां री लम्बी लेणा निजर आयी अर केई ऑपरेशन टाळणा पड़्या। रेजिडेंट डॉक्टर हिफाजत रा पुख्ता बन्दोवस्त तैय करण री मांग करता थकां काम परा नी आ रह्या है। रेजीडेंट डॉक्टर प्रशासन ने आठ सूत्री मांग पानो सूंप्यो है। मांग पाना मांय हिफाजत रा पुख्ता इन्तजामात सागे ई स्टाइपेंड मांय 30 ऊं 35 फीसदी ताई री बधोतरी करण, स्पेसियलिटी चिकित्सा अधिकारी री सीधी भर्ती, अनिवार्य बॉन्ड री शर्त हटावण अर सीनियर रेजीडेंट डॉक्टरां री वेतन विसंगति दूर करण री मांग करी ज्यी है।

000

प्रदेश मांय नौरता रे दौरान देवी मिंदरां मांय मोटी तादाद मांय जातरू पूग रह्या है। करौली ज़िला रा कैलादेवी मिन्दर मांय आखा देश ऊं जातरू पूग रह्या है। सलूमबर ज़िला मांय जावर माइंस रा जावर स्टेडियम मांय आज नवरात्रि मेळो सरू व्ह्यो। मेळा सारू आरे-सारे रा गांवाई हलकां मांय लोगां मांय घणो उमाव निजर आ रह्यो है। वठे दशहरा रा दिन रावण रो पुतळो बाळबा री बगत हजारों री तादाद मांय लोग मौजूद रेहवे है। पाकिस्तान री सरहद ऊं लाग्योड़ा जैसलमेर ज़िला रा तनोट माता मिंदर मांय ई मोटी तादाद मांय जातरू पूग रह्या है। म्हाणा खबरनवीस बतायो के ई मिंदर मांय हर भांत री व्यवस्था सीमा सुरक्षा बल-बी.एस.एफ. रा जवान देखे है।

000

नौरता रे दौरान प्रदेश मांय न्यारी-न्यारी ठौड़ां गरबा खेल्यो जा रह्या है। सांचौर मांय वठे रा लोगां सागे गुजराती कलाकार ई गरबा रो रंग जमा रह्या है। चित्तौड़गढ़ मांय चाल रह्या नवरात्र महोत्सव मांय गरबा पांडालां मांय शाम पड़ता ई डांडियां री खनक सरू व्हे जावे है जो मोड़ी रात ताई चाले है। चित्तौड़गढ़ मांय डांडिया कार्यक्रमों मांय न्यारी-न्यारी होड़ां ई राख्यी जा रही है।

000

हनुमानगढ़ जिला रा एस.पी. अरशद अली नशा मुक्ति कार्यक्रम रा तैत सोलह गांव गोद लीना है। इण ई सिलसिला मांय आज सुरेवाला अर सिलवाला खुर्द गांवां मांय नशामुक्ति कार्यशाला राख्यी ज्यी। ध्यानजोग है के नशामुक्ति सारू गोद लिया जावण वाळा गांवां मांय नशो करण वाळां अर वां ने नशीली चीजा मुहैया करावण वाळां री ठा करी जा रही है। नशो करण वाळा मोट्यारां ने वां रा पिरवार वाळां री सहमति ऊं नशा मुक्ति केन्द्र मांय भर्ती करा र ईलाज करवायो जावेला।

000

हनुमानगढ़ जिला मांय संगरिया कने बोलावाली गांव मांय आज महाराजा गंगासिंह विश्वविद्यालय री ओर ऊं अन्तर महाविद्यालय वॉलीबॉल होड़ सरू व्ही। उद्घाटन मैच बीकानेर रा डूंगर राजकीय महाविद्यालय अर तारा नगर रा मां जालीपा देवी राजकीय महाविद्यालय बीचे खेली ज्यो। होड़ मांय 13 टीमां सिरकत कर रही है।

000

भारतीय रिजर्व बैंक लगातार दसवीं दफा ब्याज री रेट मांय कोई बदलाव नी कीनो है। रेपो रेट साढ़े छः फीसदी रा लेवल माथें बरकरार राख्यी ज्यी है। रिजर्व बैंक स्थायी जमा सुविधा दर सवा छह फीसदी अर सीमांत स्थायी सुविधा दर अर बैंक रेट पौने सात फीसदी रा लेवल माथे बणायी राखण रो फ़ैसलो कीनो है। रिजर्व बैंक री मौद्रिक नीति समिति विकास माथे ध्यान देवण अर महंगाई काबू मांय राखण सारू मौद्रिक नीति रुख ने बदल र 'तटस्थ' करण रो फ़ैसलो कीनो है। रिजर्व बैंक कानी ऊं

जारी बयान रे मुजब चालू माली साल रा पहला तीन महीना मांय वास्तविक सकल घरेलू उत्पाद मांय छह दशमलव सात फीसदी री बधोतरी दर्ज करी ज्यी।

000